

ROTARY CLUB OF ARUBA

DISTRICT GOVERNOR ROTARY INTERNATIONAL NA ARUBA

DI BISHITA NA GOBERNADOR, CENTRO KIBRAHACHA Y YMCA DAKOTA

STA.CRUZ-- Durante di e siman aki, tabata di bishita na Aruba, e Gobernador di e Distrito 4370 di Rotary Internacional. E District Governor, sr. Sebastian Collura tabata den compania di su casa Sandra y su asistente oficial di Curacao, sr. Jaime de Sola cu su casa Madeleine. Nan a ser ricibi pa Presidente di Rotary, sr. Orlando Hoevertsz y sr. Lufrido Croes, secretario. E district Governor tabata tin un reunion oficial cu e Board di Rotary Club of Aruba. Tambe el'a haci un bishita oficial na nos Gobernador, Su Excelencia, sr. Fredis Refunjol. Rotary Club of Aruba ta un di instancianan

cu ta contribui mas na e existencia y mantenimiento di Centro pa Nos Grandinan Kibrahacha, y debi na esaki e Gobernador di Distrito a haci un bishita na e centro den compania di algun miembro di Board di Rotary Club of Aruba. Aki e tabata tin e oportunidad pa mira con nos grandinan ta ser entreteni y con e renovacion di e centro a keda. Tambe nan a bishita e edificio di YMCA Dakota, cual ta den pleno construcion. Rotary Aruba tambe ta un di e motornan tras di e existencia y mantencion di YMCA y pa e motibo aki e proyecto a ser presenta na District Governor Collura. Sr. Collura a presencia e

reunion semanal di Rotary Club of Aruba na Windows Restaurant situa na Divi Links. Aki den un ambiente ameno cu fellow Rotarians y nan partners, el'a trece dilanti su vision pa e aña aki y tur e proyectonan cu Rotary Internacional y su distrito lo haci na 2008-2009. Rotary Club of Aruba tambe a presenta su plannan pa 2008-2009. Akinan Presidente Orlando Hoevertsz a trece dilanti e diferente proyectonan cu ta y lo ser organiza na beneficio di e comunidad di Aruba. Tambe a trece dilanti proyectonan nobo cu lo por haci conhuntamente cu otro clubnan di Rotary den e distrito 4370.

